


FETO MAKSALAK

Introdusaun

Tempu Kuarezma nian mak tempu ne'ebé tulun ita atu reflète no halo esperiénsia kona-ba rekonsiliasaun no perdaun. Tan ne'e Evanjellu kona-ba feto maksalak bele halo labarik sira hakle'an Jezús nia mensajen kona-ba perdaun liuhusi Jezús nia hahalok no aiknanoi ne'ebé Jezús haktuir ba fariseu Simão.

Esperiénsia

Ita hahú ho esperiénsia ida: prepara surat tahan ida iha ne'ebé hakerek 50 dolar no surat tahan ida tan iha ne'ebé hakerek 500 dólar. Bele fahe labarik sira ba grupu, ka husik sira hamutuk; se fahe sira ba grupu entrega ba grupu ida-idak atu sira hakerek. Se labarik sira halibur hamutuk, bele husu ba sira atu hakerek hamutuk iha surat tahan, bele sosa saida ho 50 dólar, no bele sosa saida ho 500. Halo ona lista ida ne'e, halo labarik sira komprende katak Jezús nia aiknanoi ko'alia kona-ba aspetu ida ne'e: iha ema ida ne'ebé tenke fó sasán 50 dólar nian ba ema seluk, no ida fali tenke fó 500 dólar.



Animadór sei husu ba labarik sira hanesan Jezús: “Se ema ida ne'e kasuk sira-nia tusan, ida ne'ebé mak sei hadomi nia liu tan? Imi koko ona atu deve buat ruma ba kolega ida; se kolega ida ne'e la husu tan buat ne'ebé imi deve, imi sente oinsá?”

Tuir mai bele hetan evanjellu ho diálogo, atu favorece katak ida-idak bele hatene didi'ak ninia parte.

Evanjellu: Lk 7,36-50

(bele lee hanesan bainbain, ka lee hodi halo diálogo)

³⁶Fariseu ida konvida Jezús atu han hamutuk ho nia. Tama tiha iha nia uma, Nia tuur iha meja. ³⁷Tuir mai, feto moris aat ida husi sidade, rona tiha katak Jezús mai han iha fariseu nia uma, mai lori botil ida ho mina morin, ³⁸ba Jezús nia kotuk no hahú fase Nia ain ho nia mataben, hodi hamaran ho nia fuuk, rei no kose ho mina morin. ³⁹Haree tiha buat ne'e, fariseu ne'ebé konvida Nia hateten ba nia an: “Ema ne'e profeta ida karik, nia sei hatene feto ne'e ne'ebé kona Nia se los, katak feto aat ida.” ⁴⁰Jezús hatán, hodi dehan ba nia: “Simão, Ha'u hakarak hato'o buat ruma ba ita.” Nia dehan: “Ko'alia ba, Mestre.” ⁴¹“Loron ida ema ida impresta osan ba ema na'in rua: ida halo tusan osan mean atus lima, ida seluk lima nulu. ⁴²Tanba sira na'in rua la bele selu fali, nia kasu tiha sira nia tusan. Ida ne'ebé mak sei hadomi nia liu tan?” ⁴³Simão hatán: “Ha'u hanoin katak ida ne'ebé nia tusan boot liu.” No Jezús dehan: “Ita hanoin loos!” ⁴⁴Hafoin Nia fila oin ba feto, hodi dehan ba Simão: “Ita haree feto ne'e? Ha'u tama iha ita nia uma, ita la fase Ha'u nia ain; maibé nia fakar nia mataben ba Ha'u nia ain hodi hamaran ho nia fuuk. ⁴⁵Ita la rei Ha'u, maibé nia la para rei Ha'u nia ain houri oras ne'ebé Ha'u tama mai. ⁴⁶Ita la kose mina ba Ha'u nia ulun, maibé nia kose Ha'u nia ain ho mina morin. ⁴⁷Tan ne'e, Ha'u dehan ba ita katak nia hetan perdua ona husi nia sala barak, basa nia hatudu domin boot. Ema ne'ebé hetan perdua ba sala utoan de'it, nia mos hadomi utoan de'it.” ⁴⁸Tuir mai, Nia dehan ba feto: “Ó nia sala sira hetan ona perdua.” ⁴⁹Sira ne'ebé tuur hamutuk ho Nia iha meja hahú hanoin: “Ema ne'e se los atu bele kasu ema nia sala?” ⁵⁰Maibé Nia dehan ba feto: “Ó nia fiar mak soi tiha ó; la'o ba iha dame laran.”

Hafoin bele hakerek fali iha tabela tuir surat tahan boot, ka bele mós halo pergunta ba labarik sira no rona sira-nia resposta (se hakerek fasíl liu ba labarik sira atu kompara Jezús, Simão no feto)

SE	... HALO SAIDA	... DEHAN SAIDA	... HANOIN SAIDA
JEZÚS			
SIMÃO			
FETO SALA NA'IN			

***“Nia hatudu
domin boot.”***

Hatán tiha ba pergunta sira iha tabela halo labarik sira kompara uluknanain Jezús no Simão: sira-nia hahalok, sira-nia liafuan... labarik sira gosta liu ida ne'ebé no tansa? Hafoin husu tan: “iha imi-nia moris loron-loron nian, imi hetan ema barak hanesan Jezús? Se la'e, tansá?

Tuir mai halo sira kompara Simão no feto sala na'in. Saida mak soi feto ida ne'e, ne'ebé fariseu Simão la iha? Imi konkorda ho Jezús nia liafuan sira?

Hotu ona bele fahe sira ba grupu ho ema na'in tolu: ida halo Jezús, ida halo Simão, ida fali halo feto maksalak, no grupu ida-idak halo fali drama hodi espresa ho sira-nia liafuan tuir buat ne'ebé akontese iha loron ida ne'ebá ba Jezús.



Orasaun

Koko atu agradese Na'i ba domin ne'ebé Nia hatudu iha ó-nia moris hodi halo orasaun badak ida. Ez: “Na'i, bainhira ha'u sente mesak, Ita mosu nu'udar belun; bainhira ha'u sala, Ita haraik Ita-nia per-daun, bainhira ha'u hanoin katak ha'u la bele troka ha'u-nia an, Ita akompaña ha'u ho esperansa...” ó mak kontinua...

Atividade

Husu ba labarik sira, kalan-kalan, bainhira sira halo ezame de konsiênsia, atu sukat buat hotu ne'ebé sira halo ka dehan ho medida domin nian. Katak duke dehan: “halo halo hanesan ne'e, ha'u sala ida ne'e...” sira koko atu avalia loron ne'ebé foin liu tuir domin: “Ha'u halo ida ne'e tanba ha'u hadomi (ha'u-nia aman-inan, ha'u-nia kolega...)? Ha'u reza tanba ha'u hadomi Jezús?”... no mós “Ha'u bele hadomi liután?”